



4 Vokabulario

Den selva tropikal di Afrika

E selva tropikal di Afrika ta e di dos mas grandi na mundu. Den e boske enorme akí tin kasi 11.000 sortu di mata ta krese. Mas o ménos 125 tipo di mamífero i 100 sortu di rèptil ta sinti nan mes na kas ei. 400 sortu di para presioso i mas ku 150 tipo di barbulètè kolorido ta bula rònt kontentu di nan. Laga nos ban wak algun di e animalnan mas di aserka. Esun di mas konosí sin duda ta e gorila. E ta e makaku di mas grandi na mundu. Ora bo mira un gorila, bo no tin nodi di kore bai. Apesar di su grandura i su forza enorme, e animal ta pasífiko, e no ta ataká ni bringa fásil. Gorila ta bestia sosial. Nan ta biba den grupo. Den un grupo asina kasi semper tin un gorila machu adulto, dos gorila machu yòn i diferente gorila embra ku nan yuchi. Kontrali na otro makaku, gorila ta basta ketu. Solamente ora un machu topa un otro gorila machu ku e ta mira komo su rival, e ta hasi masha bochincha. E ta bati riba su pechu miéntras e ta grita i gruña. Tur dos gorila ke manda i ke ta esun di mas poderoso. Gritando i hasiendo bochincha nan ta spera ku nan rival ta kore bai. Gorila ta maron skur òf shinishi skur. Un gorila machu adulto ta haña un mancha koló di plata ku ta kore na e parti abou di su lomba. E kuminda preferí di gorila ta kuminda vegetal manera fruta, blachi i kaska di palu. De bes en kuando e animal grandi akí ta kome algun insekto. Gorila gusta bai drumi trempan. Ora kuminsá bira sukú, nan ta subi palu i traha un nèshi di blachi i taki. Ei nan ta bai drumi dushi di nan te mainta.

Un otro animal masha spesial ku ta biba solamente den e selva tropikal di Afrika, ta okapi. E animal akí ta famia di shon zjiraf. Esei bo por mira na su kabes ku dos kachu chikitu i e forma di su kurpa. Un okapi tin mes lenga pekuñar ku un zjiraf. Su lenga largu koló blou kla e no ta usa pa kita blachi for di palu so, pero pa laba su wowonan tambe. Tin diferensia sí entre un zjiraf i un okapi. Un zjiraf ta muchu mas grandi i su garganta ta muchu mas largu. Lana di un zjiraf no parse esun di su primu tampoko. E parti patras i e pianan di un okapi parse esun di un zebra. Okapi ta bestia masha skiu. Kasi bo no ta haña nan mira. Den dia nan ta skonde den e matanan. Ta te anochi lat ora ta sukú, nan ta sali pa buska blachi i fruta.

Bo a yega di tende di e lora shinishi ku rabu kórá? E para akí no tin koló yamativo manera otro miembro di su famia. Pero e ta e úniko lora na mundu ku por bisa mas ku 750 palabra. Lamentablemente e para ta menasá. Tin hende ta saka e loranan shinishi for di selva afrikano pa bende nan. Asina e para maravioso akí ta kore riesgo di stòp di eksistí. Hende mester protegé naturalesa. Asina so nos por keda disfrutá di selva bunita manera esun na Afrika.

Tarea 1

- Kiko bo ta yena?
- Lesa e frase bou di kada pintura.
 - Buska e palabra ku falta, den e rei aki bou.
 - Skibi e palabra den bo skref.

- ataká
- kuminda vegetal
- okapi



Gorila ta un bestia ... ku ta biba den grupo.




E makaku grandi akí ta un bestia pasífiko ku no ta ... fásilmente.



Solamente ora e topa ku un ... e bestia grandi akí ke mustra ken ta manda.



Gorila gusta ... manera fruta, blachi i kaska di palu.



Aunke e ... ta famia di zjiraf, e tin algu di un zebra tambe.




Ora un bestia ta ..., e ta skonde pa otro bestia i hende no mir'é.

Tarea 2

- Bo sa e kontesta?
- Tin dos tipo di gorila. Un tipo di gorila ta biba den seru altu. E otro tipo di gorila ta biba den selva na Afrika.
- E gorila akí mayoria di biaha bo no ta

haña den palu. E ta kana rònt. Ta ora kuminsá bira sukuritu, e ta subi palu numa. Dikon bo ta kere?

- rival
- skiu
- sosial



5h Kua palabra bo ta skohe?

- Skohe pa kada splikashon e palabra korekto.

1. Ora bo gusta anda ku otro
2. Ora bo tin miendu pa hende aserká bo muchu
3. Gusta pas i trankilidat
4. Hende òf bestia ku ta kompetí ku un otro
5. E makaku di mas grandi di mundu
6. Kuminda ku ta konsistí di fruta, bèrdura, nechi etc.
7. Gosa di algu
8. Un animal ku tin algu di un zjiraf i un zebra
9. Kuminsá bringa



ataká
disfrutá
gorila
kuminda vegetal
okapi
pasífiko
rival
skiu
sosial